



Aqqusinikkut angallannermut oqartussaaffiup pigisanullu nalilinnut inatsisip tiguneqarnissaanut tunngavissat tamarmik nassuiaasiorfigineqarnissaat siunertaralugu Naalakkersuisut Naalagaaffiup oqartussaasuinut saaffigineqqullugit peqquneqarnissaannik Inatsisartut aalajangiiffigisassatut siunnersuut.

(Inatsisartunut ilaasortaq Kuno Fencker, Siumut)
(Siullermeerneqarnera)

Demokraatit siunnersuutip saqqummiunneqarneranut qujapput.

Aallaqqaasiutitut siunnersuut iluarisimaarparput suliap pisariaqartumik aallartisarnerimmagu pingaartuullunilu, uagut aalajangiisartutut nunatsinni nammineerluta oqartussaaqataanerput aallaavigalugu aalajangiisarnissatsinnut pisinnaatitaaffitsinnik annertusaataasusaaq.

Uagutsinnut pingaartuuvoq erseqqissassallugu, angerlaassinissatsinnik suliaq aallaartikkaagatsigu, tamanna tunngavilersorluakkamik suleqatigiinnermillu pitsaasumik aallaaveqartassasoq. Taamaattumik isummersuutigisariaqarparputtaaq, erseqqissarluarlugulu, nassuiaat taanna kikkut akilissaneraat, Inatsisartuni amerlanerussuteqartunit akuerineqassappat. Tullianillu, nassuiaat siunissaq eqqarsaatigalugu sumut atorneqassanersoq.

Maannakkut suliasat 32-iupput, danskit naalagaaffiata oqartussaaffigisai, qularnanngilluinnartumik Kalaallit Nunaanni inuunitsinnut sunniisartunik. Naak suliasanik angerlaassisimagaluarluta, taakku ataqatigiisinnissaat ajornakusoorsimasorujussuupput, isuma kusanaraluaqisoq, inatsisit siunertarisaattut.

Assersuutigalugu isumaginninnermut- peqqissutsimullu tunngasut, aningaasartuutitai ullutsinnut naleqqutinngilluinnartut politikikkut siunertatsinnut angorusutatsinnullu. Taamaattumik aaqqissuusseqqiinerit pisariaqartut pilersittariaqarpagut. Siunertat pitsaasuugaluartut, angerlaassinerni, imaaliillaannaq isummerfigisinnaanngilara, ilumut siunissaq eqqarsaatigalugu kivissinnaanerigut, ilinniartitaanerit qaffassaaffiginngikkutsigit annertuumik, tassanilu pingaartumik Meeqqat atuarfiat.

Uagut Demokraatiniit suli annertunerusumik angusaqarusussuseqarpugut, aammalu piviusunik ilumoortunik pisariaqartitsineq taakkulu toqqissisimasumik ammasumillu susassaqrifiit tamaasa pillugit nalunaarusiortoqarnissaanik kissaateqarluta. Qularutiginngilluinnarparput, nalunaarusiorneq taamaattoq piviusorpalaartumik oqallinnermik qanoq aammalu qaqugu uagut Kalaallit Nunaanni namminiilivinnissatsinnut paasinarsaataasusaaq. Ilumoorsaartumik malitassamik pisariaqartitsivugut. Kinami "illumini naalagaajumassanngila"? Kiammi toqqissisimaffigerusussanngilaa, uagut politikikkut ersarissumik malitassaqarnissaq, alloriarnerit suut tulleriissaarinerillu suut ingerlanneqassanersut? Inuit amerlanerpaat, oqaloqatigisakka taamatut kissaateqarput.



Ajornartorsiut unaanngilaq, ilumut namminiilivissanersugut, aammalu qaqugu. Nalornineq uaniippoq, qanoq tamanna angussaneripput. Tassani isumaqarpunga, apeqqutaalluinnarteq nalunaarsuutit pilersaarutillu piginerigut, angerlaassuinita iluatsinnissaanut innuttaasut isumannaatsuunissaat nunattalu aningaasatigut inissisimanagera ataqqillugu. Tamanna ajunnginnerpaallunilu sunniuteqarluarnerussaaq, oqartussaaffiup angerlaannissaa aallartissimagipput, uagutsinnut pigissaarnerulertitsillunilu aningaasartuutunik ikinnerpaamik kinguneqartussaq.

Taamaattumik Demokraatiniit allannguutissatut siunnersuuteqarusuppugut ima oqaasertalimmik:

Inatsisartunut aalajangigassatut siunnersuut, Naalakkersuisut peqquneqassasut danskit naalagaaffiannut atassuteqaqqullugit nalunaarusioqqullugu oqartussaaffiit, Danmarkimit ingerlanneqartut ataatsimut nalunaarusiorneqassasut aningaasatigut inuttullu nukiit- piginnaasallu pisariaqartinneqartut pillugit. Taakkua inuiaqatigiinnut kingunissai taamatutaaq sukumiisumik nassuiarlugillu allaaseralugit. Nassuiaatip suliarinera aallartinneqareersimassaaq kingusinnerpaamik 1. Marts 2023 nassuiaallu piareersimassalluni Inatsisartunullu agguanneqareersimassalluni UKA2024 pitinnagu.

Taamatut oqaaseqarluta siunnersuut Inatsisit pillugit ataatsimiititaliamut suliarisassanngorlugu innersuupparput.